

ESIN JOSEPH KE UFỌK-ŃKPỌKỌBI

Genesis 39:1-6, 19-23; 1 Peter 2:19-24

ỌYỌHỌ UKPEP-ŃKPỌ 34

Eke Mkparawa

IKỌ IBUOT: “Mbuotidem mbufo emi ema edomo ewut anam ime ọwọrọ” (James 1:3).

Oyom Usuñ Ọkpọñ Ufọk

Ke ema ekenyam Joseph enọ mbon Ishmael, ema emen enye ekpọñ isọñ Canaan ke nsinsi. Enye ikafiakke ika obio esie; ikosoboke ye mbon ufọk esie aba tutu ke ńkpọ nte isua edip ama ekebe ke ini nditọ ete esie ekekade Egypt ndidep udia. Enye ama ama ete esie eti-eti, ekeme ndidi ama onyuñ ama nditọ ete esie okposuk edi nte mmọ ekediokde ye enye, koro ke ini enye amakadaba mme ndap, enye ama etiñ ọnọ mmọ; ńko ke ini ete esie ọkọdọñde enye asaña anyan usuñ aka ke Shechem ndikese nte ńkpọ etiede ye mmọ, enye ama onyime ndinam ntre. Ekeme ndidi ke enye ama enyene ọkpọsọn udọñ abaña ufọk sia enye ọkọkpọñde kpukpru ńkpọ emi enye ọkọfiokde onyuñ amade ke ndika ke obio mme okpono-ndem, ebiet emi mme owo mikokponoke ata Abasi.

Ndusuk mme owo edu ke mkpaidem oto ke nta emi Joseph mikodomoke ndifehe ke ubọk mbon Ishmael. Usuñ mmọ tọñọ ke Dothan ka ke Egypt akada mmọ aka usuk-usuk, ke ńkañ eke esañade esim obio esie, ndusuk ini, ke mme itie ke isañ mmọ, mmọ ikesiyomke usuñ ikpọñ ufọk ete esie. Edi Joseph ekedi ata eyen Abasi, ekeme ndidi ke enye ama ekere ete ke Abasi akayak akwa ndutuhọ oro osim imọ ye nta, enye ama onyuñ onyime ndibet ini Abasi ndiyarare uduak Esie.

Ime Joseph

Nnyin isiwakke ndinyene ime ke ini idomo osimde nnyin, inyuñ itre ndifiok nte ke Abasi okut akpatre tọñọ ke akpa ndien ke idiyakke baba ńkpọ ekededi osim nnyin ibọhọke se idide ke ufọn nnyin ye se idinọde Enye ubọñ. Ekeme ndidi ke Abasi ama adaresit ke ini Enye ekesede Joseph onyuñ okutde nte enye emede ime ke ndiyak idem nnọ mme andimum enye eda enye eka ke Egypt, ye nte enye onimde ke akpanikọ ete ke Abasi ekeme ndiñwam imọ “ndinyuñ ńkpeme idem ke idiok-ńkpọ emi odude ke ererimbot.” Ke akpanikọ Jacob ama etiñ ọnọ enye abaña idiok-ńkpọ Egypt, onyuñ oduri enye utọñ abaña utọ mme idiok-ńkpọ oro; ndien okposuk Joseph ekedide eyen isua efureba, enye ama ebire ke esit esie ndidu uwem nsaña ke mbuotidem mme ete esie Abraham, Isaac, ye Jacob. Enye ekenyene ukem udọñ emi ke esit esie nte Daniel ekenyenede ke ediwak isua ema ekebe ke ini ekemumde enye eka Babylon nte mbuot-ekọñ, enye ama “aduak ke esit esie, ete ke imọ idisabakede idem imọ ke udia edidem” (Daniel 1:8).

Mbon Midian ekenyam Joseph enọ Potiphar emi ekenyenede akwa idaha ke ukara Edidem Pharaoh. Ikedighe ke ndudue ke ekenim Joseph ntre ekpere ebekpo ubọñ, Abasi ke okosuk ekpeme se inade ibet enye onyuñ ebeñe enye onim ọnọ utom esie ke ini iso.

Ete ufọk Joseph ama ọsọsọ okut eti uwem esie. Nte eyen Abasi enye ama anam utom ke ofuri esit ye ke idaresit; utom emi enye akanamde ama onyuñ okut unen ye ńkọri tutu Potiphar okut ete ke Abasi odu ye enye. Oro ekedi ńkpọ mkpaidem koro mbon Egypt ikekponoke ata Abasi. Mi ke inyene ebiet efen emi Abasi ọkọdiọñde mme idiok owo oto ke owo Abasi emi odude ke otu mmọ, ukem nte ekedide ke ini Jacob okoduñde ye Laban.

Ebuotidem Ke Joseph

Potiphar ama ọbuotidem ke Joseph tutu enye ayak kpukpru se enye enyenede ọnọ enye ekpeme. Enye ikonyuñ ikpaha idem ndiduñọre mme edinam Joseph. Ekese ini nnyin imesikut nte mme idiok owo eyomde Nditọ Abasi enam ńkpọ enọ mmọ ke ini mmọ eyomde owo akpanikọ, mme owo emi mmọ edibuotde idem. Ndusuk, mmọ eyebuotidem ye esen owo emi odude edisana uwem ekan idem mbon ufọk mmọ. Edi akpan ńkpọ owo emi adade idem nte Owo Abasi ndidu utọ uwem emi edinamde ererimbot ekut ntre ye enye enyuñ ebuotidem ye enye.

Ndusuk Joseph ama ekere ete sia imọ ima ikenyene akwa mfọn ntem, imọ iyese ọndikut nta emi ikedide ke Egypt. Edi ikebighike, kpukpru mfọniso esie ekpere ndibe mfep. Sia enye mikenyimeke ndinam idiok-ńkpọ nnyuñ ndue Abasi ye ete ufọk esie ńko, ema esu nsu edian enye enyuñ esin enye ke ufọk ńkpọkọbi. Joseph okpokonyime ndikpa ńkan enye ndidue Abasi esie, ke ntre akana nte enye ọbọ ufen ke unana nta.

Ọbọ Ufen Ke Ime

Nnyin imọtọñọ nta ikut uwem Joseph ye eke Daniel nte ebietde kiet eken. Ema edori Daniel ikọ enyuñ esin enye ke ufọk-ńkpọkọbi, kpa obube ekpe, edi Abasi ama asaña ye enye onyuñ afak enye. Joseph ekenyene ndibet ke esisit ini mbemiso efak enye (enye ama odu ke ufọk ńkpọkọbi ke ńkpọ nte isua ita); Abasi ama onyuñ odu ye enye ńko. Enye ama okut mfọn ke ubọk ekpeme ufọk ńkpọkọbi, emi akayakde enye anam nte enye amade, enye ikonyuñ inyeneke ndinọ ibat utom esie. Mi ńko Abasi ama ofori kpukpru edinam esie. Nso utọ ńwọronda usuñ

ke Joseph ye Daniel ekewut spirit Christ ke ini mmọ ekebode mme ufen emi ke unana ndudue edi mmọ isukke uyo inyuñ idomoke ndisio usiene! Peter eketiñ abañã Jesus ete: “Ke ini owo osuñide Enye, Enye isuñike mmọ usiene; ke ini Enye ebede ke ndutuhọ, Enye itiñke ikọ ndige; edi ayak ikọ Esie esin ke ubọk Andikpe edinen ikpe” (1 Peter 2:23). Andikpe edinen ikpe oro ekedi Abasi, Joseph ñko okonyuñ ayak idemesie esin Enye ke ubọk ndien ema ediọñ enye eti eti ke ndinam ntre.

MME MBUME

- 1 Nte Abasi ama odu ye Joseph ke ufọk ñkpọkọbi?
- 2 Nte spirit edisio usiene esidu ke uwem ata owo Abasi?
- 3 Tiñ nte Christ okowutde anyan ime ke kpukpru ndutuhọ esie.
- 4 Ke ntak idiọk-ñkpọ mme anie ke Christ ọkọbọ ndutuhọ onyuñ akpa?
- 5 Nso ukpep-ñkpọ ke nnyin ikeme ndibọ nto ke ime ye ñkop item Joseph?